

欽
定
全
唐
文

欽定全唐文卷四目錄

太宗一

臨層臺賦

感舊賦并序

小山賦

小池賦并序

威鳳賦

皇德頌

賜真人孫思邈頌

答薛收上諫獵書令

二名不偏諱令

置文館學士教

建置二王後國官廟宇制

冊封突利可汗制

加李靖特進制

令所司與禮官議宗廟制度制

授鄆王元裕等官制

授高士廉左僕射制

授顏師古祕書監制

授長孫無忌太子太師房元齡太子太傅蕭瑀太

子太保制

授鄧王元裕等刺史制

授安州刺史吳王恪等官制

授魏王泰雍州牧制

即位大赦詔

加淮安王神通燕郡王藝開府儀同三司詔

放宮女詔

備北寇詔

封吏部尚書長孫無忌等詔

諭崇篤實詔

立中山王承乾爲皇太子詔

封孔德綸爲褒聖侯詔

改元貞觀詔

令有司勸勉民間嫁娶詔

禁官人違律詔

授長孫無忌尚書右僕射詔

緩力役詔

賑關東等州詔

褒獎崔季舒等詔

允長孫無忌遜位詔

旱蝗大赦詔

收埋骸骨詔

貶裴虔通詔

致仕朝參在見任本品之上詔

禁奏祥瑞詔

爲戰亡人設齋行道詔

欽定全唐文卷四

太宗皇帝

帝諱世民高祖神堯皇帝次子方四歲有書生謁高祖見
帝曰龍鳳之姿天日之表其年幾冠必能濟世安民語畢
而去不知所往因以爲神故採其語名之首創大業平定
天下初封趙公進爵秦王武德九年立爲太子八月受內
禪明年改元貞觀在位二十三年年五十三諡曰文皇帝
廟號太宗追尊文武大聖大廣孝皇帝集四十卷

臨層臺賦

惟萬幾之暇景屏千慮於巖廊元英移其暮節白日黯其
斜光鬱金階兮起霧碧玉宇兮流霜延複道於阿閣啟重
門於建章爾乃崇基迴構危簷閒出暑結冬臺寒濃夏室
望雕軒之拱漢觀鏤檻之擎日柱引桂而圓虛芬舒蓮而
倒實霞觀近兮紅逼煙樓遙兮翠密念作者兮爲勞愧居
之而有逸於是慨然自思情懷不怡雖移新之建址實從
故而裁基鑒前王之御世亦因機而化之換卑宮於穴處
改巢樹於茅茨何燥濕之殊致乃澆淳之換時有前前之
累改無後後之相師則若阿房初製窮八荒之巧藝甘泉

始成極三秦之壯麗工靡日而不勞役無時而暫憩加以
長城亘地絕脈遐荒疊郭峙漢層簷映廊反是中華之弊
翻資北狄之強烽纔煙而已備河欲凍而先防玉帛殫於
帑藏黎庶殞於風霜噴胡塵於渭水騰朔馬於漁陽罄有
限之賦斂給無厭之豺狼旣陵轢於千古乃虔思於百王
屬虛躬之纂武登皇圖而御宇宏三策於廟堂變千機於
狂虜頓王綱於沙漠製雲羅於海浦移種落殄凶渠卷毳
帳埽穹廬門無關於地軸戶不納於天樞肆黎元於耕鑿
一文軌於車書循今蹤兮覽前跡俯層城兮臨太液鑑高

深之外固蕩心神而內益有土木之二勞非干戈之兩役
雖復重基數仞異細柳之初營疊岸盈丈開上林而玩兵
彼露臺之一儉乃延德於蒼生此崇基之漸泰方起謗於
黎甿利懷小而忘大害棄重而思輕是猶蜀侯之貪金喪
其國於岷峨智伯之縱辯迷自灌於洪波鑒損益而爲寡
殊禍福而成多故庸愚之尚志豈賢達之殊智至若膏雨
雲飛八紘廣被信觸類而流澤非有求於報施故謂施而
不自矜者亦成功之大義受而不知感者乃悖德之深累
澄遣心意坐怡情抱一德是珍萬物非寶不避辱於真惡

豈求榮於僞好旣同德而同心共流芳於王道

感舊賦

并序

余將問罪東夷言過洛邑聊因暇景散慮郊畿流盼城闕
之閒覩弱齡遊觀之所風雲如故卉木維新少壯不留忽
焉白首追思曩日緬成異世感時懷舊撫轡忘歸握管敘
情賦之云爾

惟端扈之餘隙屬凝陰於暮年時觀兵於九伐聊息駕於
三川登臨原隰悵望郊壩覽綺紈之遊踐觀疇昔而依然
地不改其城闕時無異其風煙想飛蓋於河曲思解佩於

芝田挾彈銅駝之右連鑣金谷之前薪指倏其代謝舟壑
俄而貿遷屬隋季之分崩遇中原之喪亂濯龍變爲汙池
平樂化爲京觀天地兮厭黷人神兮憤惋遂收袂而電舉
乃奮衣而雲翔據三秦兮鳳跼出九谷兮龍驤揮寶劍之
虹彩迴雕戈於日光掃欃槍兮定六合廓氛沴兮靜八荒
昔總戎於藩屏今拱己於巖廊營餘故柳壘有殘牆懷壯
齡之慷慨撫虛躬而自傷觀世俗之飄忽鑒存亡於宇宙
林何春而不花花非故年之秀水何日而不波波非昔年
之溜豈獨人之易新故在物而難舊歲月運兮寒復暑日

月流兮夜還晝信造化之常經孰聖賢之可救於是停輿
郊郭極眺山川信茲都之壯麗乃卜宅於姬年興亡兮代
襲隆替兮相沿惟在德而爲故實棄道而難全仰煙霞兮
思子晉俯浩汗兮想張騫歎高蹤之靡覲嘉令譽之空傳
聊憑軾而靜慮懷古人而悵焉況復氣結隆冬歲窮餘律
對落景之蒼茫聽寒風之蕭瑟雲散葉而無蒂雪凝花而
不實霧嶺斷兮疑連煙林踈兮似密節物同於前載懽憂
殊於曩日扣沈思而多端寄翰墨而何述

小山賦

何四序之交運轉三陽之暮時風辭暄而入暑樹替錦而成帷想蓬瀛兮靡覲望崑閬兮難期抗微山於綺砌橫促嶺於丹墀啟一圍而建址崇數尺以成岬旣無秀峙之勢本乏雲霞之資承墜宇之殘露挂低空之斷絲爾乃參差絕巘葳紆短逕風暫下而將飄煙纔高而不暝寸中孤嶂連還斷尺裏重巒欹復正岫帶柳兮合雙眉石澄流兮分兩鏡爾其移芳植秀擢幹抽莖松新翠薄桂小丹輕細影雜兮俱亂弱勢交兮共縈纔有力以勝蝶本無心而引鶯半葉舒而巖暗一花散而峰明何纖微之同景亦卑細以

相成於是換浮歡於沈思賞輕塵於勝地俯蟻垤而有餘
仰終南而多愧非爲固於九折庶無虧於一簣聊夕翫而
朝臨足攄懷而蕩志

小池賦并序

許敬宗家有小池作賦賜之

若夫素秋開律碧沼凝光引涇渭之餘潤縈咫尺之方塘
竹分叢而合響草異色而同芳徘徊躑躅淹留自足疊風
紋兮連復連折回流兮曲復曲映垂蘭而轉翠翻輕苔而
動綠牽狹鏡兮數尋泛芥舟而已沈涌菱花於岸腹擘蓮

影於波心減微涓而頓淺足一滴而還深於時景落池濱
霧黯踈筠舒卷澄霞彩高低碎月輪露宿鳥之全翻隱游
魚之半鱗岸隨年而或故流與日而終新雖有慙於溟渤
亦足瑩乎心神

威鳳賦

有一威鳳憩翮朝陽晨遊紫霧夕飲元霜資長風以舉翰
戾天衢而遠翔西翥則煙氛閼色東飛則日月騰光化垂
鵬於北裔訓羣鳥於南荒弭亂世而方降膺明時而自彰
俯翼雲路歸功本樹仰喬枝而見猜俯修條而抱蠹同林

之侶俱嫉共榦之儔並忤無桓山之義情有爰州之凶度
若巢葦而居安獨懷危而履懼鴟鴞嘯乎側葉燕雀喧乎
下枝慙已陋之至鄙害他賢之獨奇或聚昧而交擊乍分
羅而見羈戢凌雲之逸羽韜偉世之清儀遂乃蓄情宵影
結志晨暉霜殘綺翼露點紅衣嗟憂患之易結歎矰繳之
難違期畢命於一死本無情於再飛幸賴君子以依以恃
引此風雲濯斯塵滓披蒙翳於葉下發光華於枝裏仙翰
屈而還舒靈音摧而復起盼八極以遐翫臨九天而高峙
庶廣德於衆禽非崇利於一己是以徘徊感德顧慕懷賢

金匱要略卷之五
憑明哲而禍散託英才而福延答惠之情彌結報功之志
方宣非知難而行易思令後以終前俾賢德之流慶畢萬
葉而芳傳

皇德頌

厥初造化人倫既興乃建君長司牧黎烝肇自文畫爰代
結繩軒昊既謝唐虞以外後隋德衰順時革命三季之末
干戈是爭赫矣神武經期作聖下括九圍上齊七政業統
文武勲邁高光何險不濟何患不攘士女綏悅筐厥元黃
斯物之至昭於我王我王覆育資生懷造配堯登唐方周

在鎬翕受敷施明徵定保允迪厥德惟清帝道帝道欽明
天下和平三時不害百穀以成我庾斯積如坻如京旣富
而教訟息刑清明明天子令聞不已百姓爲心萬邦在已
家賴寬政朝稱多士齊一華戎混同書軌東池溟渤西苑
隅邱八蠻職貢六狄懷柔至德潛洽元化旁流日慎一日
雖休勿休先天不違靈物効質丹羽儀韶翠黃承轡甘露
零草祥風應律嘉禾醴泉比焉自出符瑞見兮煥圖書壇
場設兮望鑾輿至人忘己體沖虛凝神姑射厭宸居厭宸
居叶冥契龍駕昇兮邈遐逝垂元範兮光來裔與元象兮

長昭晰飛英聲兮越三代永錫祚兮萬億載

賜真人孫思邈頌

鑿開徑路名魁大醫羽翼三聖調和四時降龍伏虎拯衰
救危巍巍堂堂百代之師

答薛收上諫獵書令

覽讀所陳實悟心膽今日成我卿之力也明珠兼乘豈比
來言當以誠心書何能盡今賜卿黃金四十錠以酬雅意

二名不偏諱令

依禮二名義不偏諱尼父達聖非無前指近世以來曲爲

節制兩字兼避廢闕已多率意而行有違經語今宜依據
禮典務從簡約仰效先哲垂法將來其官號人名及公私
文籍有世及民兩字不連讀者並不須避

置文館學士教

昔楚國尊賢崇道光於申穆梁邦接士楷德重於鄒枚咸
以著範前修垂芳後烈顧惟菲薄多謝古人高山仰止能
無景慕是以芳蘭始被深思冠蓋之遊丹桂初叢庶延髦
俊之士旣而場苗蓋寡空留皎皎之姿喬木從遷終愧嚶
嚶之友所冀通規正訓輔其闕如故側席無倦於齊庭開

筵有待於燕館屬以大行臺司勳郎中杜如晦記室考功
郎中房元齡于志寧軍諮祭酒蘇世長天策府記室薛收
文學褚亮姚思廉太學博士陸德明孔穎達主簿李道元
天策倉曹李守素王府記室參軍虞世南參軍事蔡允恭
薛元敬顏相時宋州總管府戶曹許敬宗太學助教蓋文
達諮議典籤蘇勗等或背淮而至千里或適趙以欣三見
咸能垂裾邸第委質藩維引禮度而成典則暢文詞而詠
風雅優游幕府是用嘉焉宜令并以本官兼文館學士

建置二王後國官廟宇制

二王之後禮數宜崇寢廟不修廩餼多闕非所以追崇先代式敬國賓可令所司量置國官營立廟宇

冊封突利可汗制

突利可汗阿史那什鉢苾志懷英果識機能斷情深獨悟實惟先覺往在北蕃位地兼重早知慕化特佈款誠及漠北降災龍荒兆亂潛圖決策棄難歸朝披露膽肝備陳丹赤轉禍爲福厥義可嘉宜有褒隆用彰寵渥錫茲茅土職參戎禁可右衛大將軍封北平郡王食邑千戶

加李靖特進制

高秩厚禮允屬茂勲貴德崇讓用光彝典尚書右僕射代
國公靖器識恢宏風度冲邈早申期遇夙投忠款宣力運
始効績邊隅南定荆揚北清沙塞皇威遠暢功業有成及
參聞政本職重端副綢繆翌贊勤勞宴績知無不爲歲寒
彌厲旣懷冲挹以疾固辭表䟽懇至情理難奪煩以吏職
有乖養賢宜加優寵申其雅志可特進勲如故并賜帛一
千段尚乘馬兩匹祿賜國官府佐及親事帳內防閤等並
依舊給患若小瘳每三兩日至門下中書平章事患若未
除任在攝養

令所司與禮官議宗廟制度制

朕以不造惇惇在疚日月如流星靈浸遠霜露所感觸目
殞絕宗廟之制有國大典皇運之始且事因循今山陵有
日遷祔非遠宜允舊章永世作則可令所司與禮官等詳
議奏聞

授鄆王元裕等官制

門下膏腴之地允屬茂親藩屏之重寄深盤石鄆王元裕
譙王元名並器懷韶令業尚明敏望兼梁趙譽冠鄴並
建之議可歸按部之職斯重加茲寵命仰惟國章元裕可

使持節鄧州諸軍事鄧州刺史改封鄧王元名可持節壽州刺史改封舒王食邑並如故

授高士廉左僕射制

司會政本執法任隆歷選攸難惟賢是屬特進尚書申州刺史上柱國申國公高士廉器宇冲邈機神峻遠材稱棟幹望重搢紳地惟姻婭廼誠著於疇昔業預經綸嘉庸彰於夷險出總方岳入賛機衡獻替之情譽光八舍銓總之美聲洽九流啟沃是寄鹽梅斯在宜貳端右允副式瞻可尚書左僕射特進刺史勲官封如故

授顏師古祕書監制

祕書望華史官任重選衆而舉歷代攸難守祕書監顏師古體業淹和器用詳敏學資流略詞兼典麗職司圖書亟經歲序朱紫旣辨著述有成宜正名器允茲望實可祕書監

授長孫無忌太子太師房元齡太子太傅蕭瑀太子太保制

明兩之重實固宗祧輔導之職莫先師保是以呂望召奭騰芳於有周叔孫元成繼美於隆漢司徒趙國公無忌器

範宏邈風鑒秀遠材稱棟幹地兼姻戚佐命之功勒乎鐘
鼎論道之譽穆乎台槐股肱是屬邦國攸賴教諭少陽僉
望斯在司空梁國公元齡體業忠肅識具宏通誠著霸圖
功宣鼎業奉上之節所懷必盡益國之事知無不爲必能
厲茲六行審喻三善特進宋國公瑀操行清約識局貞正
夙受先遇早升朝右立身之操必在於直道體國之心無
忘於忠義輔翼儲貳望實攸歸無忌可太子太師元齡可
太子太傅瑀可太子太保

授鄧王元裕等刺史制

門下維翰之寄允屬茂親藩屏之重必資令望鄧州刺史
鄧王元裕襟神韶令理識清確壽州刺史舒王元名體業
夷雅志尚淹和並夙膺朝寵早莅藩任政令著於謠俗嘉
譽洽於搢紳宜加榮命允茲朝典元裕可梁州刺史元名
可許州刺史封並如故

授安州刺史吳王恪等官制

門下體國經邦資懿親而作屏設官分職俟方岳以宣風
用能式固本枝克隆盤石前安州都督吳王恪等並識量
明允體業貞固禮高彝器望重維城學藝之譽日新忠孝

之風早茂分命有典僉議攸歸可依前件

授魏王泰雍州牧制

門下牧伯之重莫先畿甸周衛之職任切巡警詳求今古
必俟賢戚揚州大都督魏王泰器業凝遠文藻夙成好學
見稱樂善不倦入作卿士抑有前規重司文武允膺僉政
可雍州牧

即位大赦詔

惟天爲大七政所以授時惟辟奉天三才於是育物故能
彌綸宇宙經緯乾坤大庇生靈闡揚洪烈我大唐誕膺嘉

運載協昌期丕受龍圖肇開鳳紀太上皇徇齊作聖睿哲
欽明奄有八荒光宅四表牢籠軒昊跨躡殷周金鏡俯臨
玉燭遐被然而至德弗宰成功不居高謝萬邦委茲重器
郊禋曠典士民翹屬欽惟宗社義存享獻朕以寡昧實膺
統緒辭不獲免式纂洪業靈命旣臻用升寶位君臨兆庶
繼軌百王若涉大川罔知攸濟方資令哲共康治道今紹
祚伊始奉答天休思敷惠澤被於黎獻可大赦天下自武
德九年八月九日昧爽以前罪無重輕已發覺未發覺繫
囚見徒悉從原免武德元年以來流配者亦并放還凡厥

庶僚進爵一級其五品已上先無爵邑者封開國男六品已下各加一級關內及蒲芮虞秦陝鼎六州免二年租調自餘率土普給復一年八十已上各賜米二石綿帛五段百歲已上各賜米四石綿帛十段仍加版授以旌尚齒鰥寡孤獨不能自存者量事優恤其有至孝純著達於鄉黨徵詣闕庭厚加褒擢節義之夫貞順之婦州府列上旌表門閭高年碩學直言正諫所在長官隨狀薦舉亡命山澤挾藏軍器百日不首復罪如初敢以赦前事告言者以其罪罪之

加淮安王神通燕郡王藝開府儀同三司詔

褒崇賢戚有國彝典厚秩清階式隆朝望左武衛大將軍
上柱國淮安王神通宗室之長德品優宏締構之初早樹
勲績右武衛大將軍上柱國燕郡王藝夙著嘉庸志懷強
毅久司戎禁見稱貞確宜加榮寵式允具瞻並可開府儀
同三司

放宮女詔

爰始正家刑於四海王者內職取象天官上備列宿之序
下供掃除之役肇自古昔具有節文末代奢淫搜求無度

朕嗣膺寶歷撫育黔黎克已厲精庶幾至理顧省宮掖其數實多恐茲幽閉久離親族一時減省各從罷散歸其戚屬任從婚娶

備北寇詔

城彼朔方周朝盛典繕治河上漢室宏規所以作固京畿設險邊塞式遏寇虐隔礙華戎自隋氏季年中夏喪亂黔黎凋盡州城空虛突厥因之侵犯疆場乘閒倖釁深入長驅寇暴滋盛莫能禦制皇運以來東西征伐兵車屢出未遑北討遂令胡馬再入至於涇渭蹂踐禾稼駭懼居民喪

失旣多虧廢生業朕分命師旅挫其鋒銳頻獲名王每夷渠帥然而凶狡不息驅侵未已御以長算利在修邊其北道諸州所置城寨粗已周遍未能備悉今約以和通雖云疲寇然蕃情難測更事修葺僉曰宜之朕以版築之功方資力役畚鍤之用興發且多念彼勛勞用深怵惕加以普給優復詔書始下旋即科召有若食言百姓將疑謂予不信但民爲邦本本固邦寧醜虜馮陵實爲民患其城寨鎮戍須有修補審量遠近計度功力所在軍民且共營辦所司具爲條式務使成功宣示閭里明知此意

封吏部尚書長孫無忌等詔

褒賢昭德昔王令典旌善念功有國彝訓吏部尚書上黨
縣公長孫無忌中書令臨淄縣侯房元齡右武侯大將軍
尉遲敬德兵部尚書建平縣男杜如晦左衛將軍全椒縣
子侯君集等或夙參謀謨綢繆幃幄竭心傾懇備申忠益
或早從任使契闊戎麾誠著艱難績宣內外義冠終始志
堅金石誓以山河實允朝議無忌封齊國公元齡封邢國
公敬德封吳國公如晦封萊國公君集封潞國公邑各三
千戶

諭崇篤實詔

立人之道曰仁與義爲國之基德歸於厚自有隋馭宇政
刻刑煩上懷猜阻之心下無和暢之志遂使朋友遊好慶
弔不通鄉土聯官請問斯絕至有里門相接致胡越之乖
患難在身忘救恤之義風頽俗弊一至於此化民以德豈
斯之謂朕纂厯膺期思宏至道因兆民之所賴求萬國之
懽心凡厥庶寮咸使輯睦君臣之際期於無隱永言前失
特宜敦勵自今内外官人須相存問勿致疑阻有遇疾
遞加詢問爲營醫療知其增損不幸物故及遭憂恤隨事

欽定全唐文

卷四 太宗

十六

慰省以申情好務從篤實各存周厚朝廷無拘忌之節交遊有久要之歡遵道而行率履不越斯則上下交泰品物咸亨惠政所加達於四表布告天下咸知朕意

立中山王承乾爲皇太子詔

尚書奏議以爲少陽作貳元良治本虔奉宗祏式固邦家中山王承乾地居嫡長丰姿峻嶷仁孝純深業履昭茂早聞睿哲幼觀詩禮允茲守器養德春宮朕欽承景業嗣膺寶位憲則前王思隆正緒宜依衆請以答僉望可立承乾爲皇太子

封孔德綸爲褒聖侯詔

宣尼以大聖之德天縱多能王道藉以裁成人倫資其教
義故孟軻稱生人以來一人而已自漢氏馭歷魏室分區
爰及晉朝暨於隋代咸相崇尚用存禋祀朕欽若前王憲
章故實親師宗聖是所庶幾存亡繼絕抑惟通典可立孔
子後爲褒聖侯以隋故紹聖侯孔嗣愬嫡子德綸爲嗣主
者施行

改元貞觀詔

朕遐觀方冊歷選前王大道旣隱至公斯革莫不思樹風

聲用隆鼎命太皇膺籙受圖功成治定鄙聖人之餘事顧
天下而窅然永言俗累高居物表爰以大寶俯授微躬自
肅奉神器亟移灰律屬三正在旦萬國來庭長世之術旣
宏惟新之命方始體元居正今則其時可改武德十年爲
貞觀元年

令有司勸勉民間嫁娶詔

昔周公治定制禮垂裕後昆命媒氏之職以會男女每以
仲春之月順時行令蕃育之禮旣宏邦家之化攸在及政
教凌遲諸侯力爭官失其守人變其風致使謠俗有失時

之譏鰥寡無自存之術漢魏作教事非師古道隨世隱義
逐時乖重以隋德淪胥數鍾迤剝五都俱覆萬方咸蕩暨
參墟奮旅救彼艱危區縣削平總斯圖籍顧瞻禹跡提封
尚存乃眷周餘掃地咸盡痛心疾首寤寐無忘蓋惟上元
之大德曰生蒸民以最靈爲貴一經喪亂多餌豺狼朕肅
奉天命爲之父母平定甫爾劬勞未堪厚生樂業尚多踈
簡永言亭育用切於懷若不申之以婚姻明之以顧復便
恐中饋之禮斯廢絕嗣之釁方深有懷怨曠之情或致淫
奔之辱憲章典故實所庶幾宜令有司所在勸勉其庶人

之男女無室家者並仰州縣官人以禮聘娶皆任其同類相求不得抑取男年二十女年十五已上及妻喪達制之後孀居服紀已除並須申以媒媾令其好合若貧窶之徒將迎匱乏者仰於其親近及鄉里富有之家哀多益寡使得資送以濟其鰥夫年六十寡婦年五十已上及婦人雖尚少而有男女及守志貞潔者並任其情願無勞抑以嫁娶刺史縣令以下官人若能使婚姻及時鰥寡數少量準戶口增多以進考第如其勸導乖方失於配偶准戶減少以附殿失

禁官人違律詔

朕恭膺寶命撫臨率土永鑒前王憲章典故雖文質遞變沿革不同而發號施令殊塗一揆皆所以成當世之典謨開生民之耳目納之軌度令行禁止自律令頒下積有歲時內外羣官多不尋究所行之事動乖文旨此乃臣有所隱民不見德與夫不令而誅何以異也斯豈守道履正徇公奉法者乎自今以後官人行事與律乖違者仰所司糾劾具以名聞

授長孫無忌尚書右僕射詔

望隆朝右任重國鈞尚想風猷義惟賢戚吏部尚書齊國
公長孫無忌識量宏遠神情警發道照搢紳才資文武樽
俎之策電斷風馳干戈所指雲銷霧散幾深之慮彌著忠
義之節以彰斯固立德佐時降靈輔闕宜以翼贊授之端
揆可尚書右僕射

緩力役詔

周氏設官分掌邦事漢家創制允定章程故使百工咸理
五材異用雖沿革有時而此途莫爽但欽明之后役自子
來昏亂之朝期盡民力或祁寒隆暑未獲小康或俾夜作

明繼之以燭淫費不已凋喪爲期朕祇奉明命撫臨億兆
愛育之心發於寤寐每諮謀卿士詢訪芻蕘何嘗不以節
儉爲懷憂矜在念自非田疇耘穫軍國資須未嘗別使一
人輒求一物每有丁匠之所常申戒作之司令其寬大功
程務從閒逸少府僚屬莫不聞知而營造矛鎧催督非理
竭人之力以求已功朝夕左右尚乖期約遠方勞役何以
克堪雖四海之內無煩經始然繕治器械修葺城隍及隄
防浸決橋梁壞毀事不獲已必藉人功須慰彼民心緩其
日用宜頒告天下知朕意焉

賑關東等州詔

蟲霜爲害風雨不時政道未康咎徵斯在朕祇奉明命撫育黔黎憂閔之至實切懷抱輕徭薄賦務本勸農必望民殷物阜家給人足而陰陽不和氣候乖舛永言罪己撫心多媿河北燕趙之際山西并潞所管及蒲虞之郊幽延以北或春逢亢旱秋遇霜淫或蝱賊成災嚴凝早降有致饑饉慚惕無忘特宜矜恤救其疾苦可令中書侍郎溫彥博尚書右丞魏徵治書侍御史孫伏伽檢校中書舍人辛譔等分往諸州馳驛檢行其苗稼不熟之處使知損耗多少

戶口乏糧之家存問若爲支計必當細勘速以奏聞待使人還京量行賑濟

褒獎崔季舒等詔

齊故尚書僕射崔季舒給事黃門侍郎郭遵尚書右丞封孝炎昔仕鄴中名位通顯志存忠讜抗疏極言無救社稷之亡遂見龍逢之酷其季舒子剛遵子雲孝炎子君遵並以門遭時譴淫刑濫及宜崇褒獎特異常倫可免內侍量才別敘

允長孫無忌遜位詔

欽定全唐文

卷四

太宗

三

昔東漢功臣莫任機密西京戚里或存退讓故能長守富貴不懼危殆尚書右僕射齊國公無忌神識清舉風彩凝映賢戚之望朝野所推比軒禁不虞釁生慮表倉卒之閒厥功以茂自居樞要聲實俄遠然以椒掖之親處權衡之地深知止足有戒滿盈收衽之言情詞懇切宜遂其心以厲貪競可解尚書右僕射仍進散位開府儀同三司

旱蝗大赦詔

宥過肆眚列聖所以垂風一面三驅至人所以被物故知畫冠化俗義在無刑擊磬求情志存踈網然去聖滋遠淳

風漸薄上陵下替獄訟繁興罪名日積於簡書深文亟陳
於嘉石自非帝堯臨政臯陶作師觀色聽聲哀矜靡失雖
復三章兩造能無冤濫自新改過其道何由朕以虛薄恭
膺大寶虔對三靈君臨九服昧旦求衣夜分忘寢履薄乘
奔未足爲喻兢兢業業懼弗負荷是以詳詢卿宰下及芻
蕘務求切直救其不逮推赤心於萬物罄誠言於多士惟
以蒼生在念豈矜黃屋之尊嗟四海之未寧慮一物之失
所飭躬厲己無忘晷刻率斯道也庶感幽明思與羣辟俱
興至治而世教未康元風尚鬱去歲霖雨旣損秋場今茲

旱蝗又傷宿麥萬姓嗷然懸罄已甚此皆朕之不德兆庶
何辜將由視聽弗明刑罰失度遂使陰陽舛謬時序乖違
矜物罪己載懷憂惕若使年穀豐稔天下乂寧移災朕身
以存萬國是所願也甘心無吝此言之信有同皦日故披
露胸臆義在無隱八方率土想見朕心今東作方興而膏
澤不降仰彼雲漢翹心何已宣布寬大之恩以順雷雨之
德可大赦天下

收埋骸骨詔

隋運將盡羣凶鼎沸干戈不息饑饉相仍流血成川暴骸

滿野朕往因軍旅周覽川原每所臨視用傷心慮自祇膺
寶命義切哀矜雖道謝姬文而情深掩骼諸有骸骨暴露
者宜令所在官司收斂埋瘞稱朕意焉

貶裴虔通詔

天地定位君臣之義以彰卑高旣陳人倫之道斯著是用
篤厚風俗化成天下雖復時經治亂主或昏明疾風勁草
芳芬無絕剖心焚體赴蹈如歸夫豈不愛七尺之軀重百
年之命諒由君臣義重名教所先故能明大節於當時立
清風於身後至如趙高之殞二世董卓之鳩宏農人神所

疾異代同憤況凡庸小豎有懷凶悖遐觀典策罔不誅夷
辰州刺史長蛇縣男裴虔通昔在隋代委質藩僚煬帝以
舊邸之情特相愛幸遂乃忘蔑君親潛圖弒逆密伺閒隙
招結羣醜長戟流矢一朝竊發天下之惡孰云可忍宜其
夷宗焚首以彰大戮但年代異時累逢赦令可特免極刑
投之四裔用明逆順之理以獎君臣之義可除名削爵遷
配驩州

致仕朝參在見任本品之上詔

尚齒重舊先王以之垂範還章解組朝臣於是克終釋菜

合樂之儀東膠西序之制養老之義遺文可覩朕恭膺大寶憲章故實乞言尊事彌切深衷然情存今古世踵澆季而策名就列或乖大體至若筋力將盡桑榆且迫徒竭夙興之勤未悟夜行之罪其有心驚知足行堪激厲謝事公門收骸閭里能以禮讓固可嘉焉内外文武羣臣年高致仕抗表去職者參朝之日宜在見任本品之上

禁奏祥瑞詔

昔自帝王受天明命其有二儀感德百靈效祉莫不君臣動色歌頌相趨朕恭膺大寶情深夕惕每見表奏符瑞慚

惡增懷且安危在乎人事吉凶係於政術若時主肆虐嘉
貺未能成其美如治道休明咎徵不能致其惡以此而言
未爲可請自今已後麟鳳龜龍大瑞之類依舊表奏自外
諸瑞應奏者惟顯在物色目及出見處更不得苟陳虛飾
徒事浮詞

爲戰亡人設齋行道詔

門下刑期無刑皇王之令典以戰止戰列聖之通規是以
湯武干戈濟時靜亂豈期不愛黔首肆行誅戮禁暴戢兵
蓋不獲已朕自隋末創義志存拯溺北征東伐所向平殄

然黃鉞之下金鋌之端凡所傷殫難用勝紀雖復逆命亂
常自貽絕殞惻隱之心追以愴憫生靈之重能不哀矜悄
然疚懷無忘興寢竊以如來聖教深尚慈仁禁戒之科殺
害爲重永言此理彌增悔懼今宜爲自征討以來手所誅
翦前後之數將近一千皆爲建齋行道竭誠禮懺朕之所
服衣物並充檀捨冀三途之難因斯解脫萬劫之苦藉此
宏濟滅怨障之心趣菩提之道

欽定全唐文卷五目錄

太宗二

耕藉詔

授房元齡杜如晦左右僕射詔

賜孝義高年粟帛詔

祈雨求直言詔

爲戰陣處立寺詔

大赦詔

令皇太子承乾聽訟詔

金史卷之五
定服色詔

授李靖尚書左僕射詔

致祭古聖賢陵墓詔

收埋突厥暴骸詔

赦岐隴二州詔

曲赦武功詔

答趙郡王孝恭等請封禪手詔

令諸州剡削京觀詔

封長孫無忌等子郡縣公詔

令宗室勲賢作鎮藩牧詔

答虞世南上聖德論手詔

令州縣行鄉飲酒禮詔

加楊恭仁特進詔

禁錮亂臣子孫詔

授長孫無忌司空詔

報長孫無忌讓司空詔

遣使巡省天下詔

討吐谷渾詔

水潦大赦詔

太上皇康復詔

復建吐谷渾詔

命皇太子權知軍國事詔

度僧於天下詔

錄先朝姻舊臣僚詔

議於太原立高祖寢廟詔

令侯君集等經略吐谷渾詔

節省山陵制度詔

薦舉賢能詔

九峻山卜陵詔

封慕容諾曷鉢河源郡王詔

授溫彥博尚書右僕射詔

許魏徵遜位手詔

悼元琬律師詔

欽定全唐文卷五

太宗二

耕藉詔

周宣在位已墜茲禮近代以來彌多所闕朕祇承大寶憲章典故今將履千畝於近郊復三推於舊制宜令有司式遵典禮二十一日親祭先農藉於千畝之甸

授房元齡杜如晦左右僕射詔

尚書政本端揆任隆自非經國大材莫或斯舉中書令兼太子詹事邢國公房元齡器宇沈邃風度宏遠譽彰遐邇

道冠簪纓兵部尚書檢校侍中蔡國公杜如晦識量清舉
神彩凝映德宣內外聲溢廟堂朕自克平宇縣締構資深
叶贊經綸厥功甚茂深謀祕略動合規矩忠議讜言事多
啟沃及典司樞要綢繆宸扆開物成務知無不爲可謂神
降英靈天資人傑並宜總司衡軸光闡大猷元齡可尚書
左僕射如晦可尚書右僕射餘如故

賜孝義高年粟帛詔

百行之本要道惟孝一言終身恕而已矣春生夏長寬仁
之令行焉齊禮道德耻格之義斯在朕爰自幼年夙稟庭

訓豈徒學聞詩禮因令匡定家國是以提三尺之劍起一
旅之師戮鯨鯢於原野救黎蒸於塗炭雲雷締構備嘗夷
險仁發於心義形於色大敵必勇匪爲身謀大憝必誅志
安天下太上皇留心姑射尚想軒轅駐蹕太安使朕正居
紫極顧惟虛薄辭不獲免祇奉制誥負展當朝乃眷宮宇
載懷冰谷未明求衣乙夜忘寢靜思七政言念九功何以
答上元之心稱嚴君之意庶欲勤恤典刑舉直措枉允釐
人瘼親賢用能拯濟困窮抑損澆僞開直言之路廣不諱
之門聞所未聞日慎一日望人皆見德變於志道若一物

失所一人有惡則朕躬之責訓道不明也朕聞書曰至誠感神況於兆庶乎比聞遠近黔黎耻爲盜賊州縣囹圄多並空虛豈由德教至此自是人心厭亂因其遷善可以化之朕往因征伐行天下多矣每見村落邱墟未嘗不撫膺太息自登九五不得橫役一人惟冀遐邇休息得相存養長幼有序敬讓興行其孝義之家賜粟五石高年八十以上粟二石九十以上三石百歲加絹二匹婦人正月以來生男者粟一石鰥寡惇獨不能自存逃戶初還家無糧貯州縣長官量加賑恤諸州官人或正直廉平刑清訟簡或

貪婪貨賄害政損人宜令都督刺史以名封進白屋之內
閭閻之人但有文武材能灼然可取或言行忠信堪理時
務或在昏亂而肆情遇太平而克己亦錄名狀與官人同
申泣辜慎罰前王所重枉繫一日事等三秋州縣法司特
宜存意普告天下知朕意焉

祈雨求直言詔

朕以眇身祗膺大寶託王公之上居兆億之尊勵志克己
詳求至治兢兢業業四載於茲矣上不能使陰陽順序風
雨以時下不能使禮樂興行家給人足而關輔之地連年

不稔自春及夏亢陽爲虐雖復潔誠祈禱靡愛斯牲膏雨
愆應田疇廢業斯乃上元貽譴在予一人元元何辜罹此
災害朕是用食不甘味寢不安席瞻西郊而載惕仰雲漢
而疚心內顧諸己永懷前載旣明不自見德不被物豈賞
罰不衷任用失所將奢侈未革苞苴尚行者乎文武百辟
宜各上封事極言朕過勿有所隱

爲戰陣處立寺詔

門下至人虛己忘彼我於胸懷釋教慈心均異同於平等
是知上聖惻隱無隔萬方大悲宏濟義猶一子有隋失道

九服沸騰朕親總元戎致茲明罰誓牧登陟曾無寧歲老
弱被其桀犬愚惑嬰此湯羅銜鬚義憤捐軀抗節各徇所
奉咸有可嘉日往月來逝川斯遠雖復項籍方命封樹紀
於邱墳紀信捐生丹青著於圖史猶恐九泉之下尚淪鼎
鑊八難之間永纏冰炭愀然疚懷用忘興寢思所以樹其
福田濟其營魄可於建義以來交兵之處爲義士凶徒隕
身戎陣者各建寺刹招延勝侶望法鼓所震變炎火於青
蓮清梵所聞易苦海於甘露所司宜量定處所并立寺名
支配僧徒及修造院宇具爲事條以聞稱朕矜愍之意

大赦詔

天生蒸民樹之司牧莫不仰膺靈命克嗣寶圖用能永享
鴻名常爲稱首朕君臨八方於今四載夙興夜寐無忘晷
刻履薄馭朽思濟黔黎推心至誠庶幾王道上荷蒼昊之
眷下藉股肱之力宇內休平遐邇寧泰率此區域致之仁
壽憬彼獯戎爲患自昔軒昊以來常罹寇暴是以隆周致
涇水之師強漢受白登之辱武夫盡力於關塞謀士竭慮
於廟堂征伐和親無聞上策有隋災亂憑陵轉甚疆場之
萌曾無寧歲朕韜干鑄戟務在存養自去歲迄今降款相

繼不勞衛霍之將無待賈晁之略單于稽首交臂藁街名
王面縛歸身夷邸襁負而至前後不絕被髮左衽之鄉狼
望龍堆之境蕭條萬里無復王庭惟頡利挺身逃竄林穴
天網雲布走伏何所大同之世諒在茲日斯皆上元降祐
清廟威靈豈朕虛薄所能致此方欲至仁化物宜存寬惠
思與萬邦同享斯福可大赦天下自貞觀四年二月十八
日昧爽已前罪無輕重自大辟以下繫囚見徒皆赦除之
逋負官物三分免一分其謀反大逆妖言惑衆及殺期親
以上尊長奴婢部曲反主官人枉法受財不在赦例鰥寡

孤獨不能自存者州縣量加賑濟賜天下大酺五日敢以赦前事相告言者以其罪罪之

令皇太子承乾聽訟詔

皇太子承乾宜令聽訟在茲恤隱自今以後訴人惟尚書省有不伏者於東宮上啟令承乾斷決今若有固執所見謂理不盡然後聞奏

定服色詔

車服以庸昔王令典貴賤有節禮經彝訓自末代澆浮采章訛雜卿士無高卑之序兆庶行僭侈之儀遂使金玉珠

璣靡隔於工賈錦繡綺縠下通於阜隸習俗爲常流遁亡
反因循已久莫能懲革朕繼踵百王欽承寶運思宏典制
垂範後昆永鑒前失義存釐改其冠冕制度已備令文至
於尋常服飾未爲差等今已詳定具如別式宜即頒下咸
使聞知

授李靖尚書左僕射詔

端右望隆寄任尤重實資勲德朝難其選左光祿大夫行
兵部尚書代國公李靖識度宏遠才略優贍博綜機務兼
資文武誠著夷險效彰出納便蕃省闡詳謹有聞宜緝彝

倫允茲名器可尚書左僕射

致祭古聖賢陵墓詔

朕丕承先緒積慶累仁上繼鴻基克隆寶祚欽若稽古緬想往冊英聲茂實志深褒尚始茲巡省眺矚中塗漢氏諸陵北阜斯託寂寥千載邈而無祀攬轡興懷慨然遐念開闢以降肇有司牧厯選列辟遺跡可觀良宰名卿清徽不滅宜令所司普加研訪爰自上古洎於隋室諸有名王聖帝盛德寵功定亂弭災安民濟物及賢臣烈士立言顯行緯武經文致君利俗邱壟可識塋兆見在者各隨所在條

錄申奏每加巡守簡禁芻牧春秋二時爲其致祭若有墮壞即宜修補務令周盡以稱朕意

收埋突厥暴骸詔

突厥種落往逢災厲病疫饑饉殞喪者多暴骸中野前後相屬幽魂靡託酸莫無所永言矜悼有懷惻隱宜令所司於大業長城以南北分道巡行但有骸骨之所酒脯致祭速爲埋瘞務令周悉以稱朕意焉

赦岐隴二州詔

朕恭膺寶命握圖馭歷屬喪亂之後承凋弊之餘宏宣德

化勵精治道遐邇肅清要荒來服聊因務暇觀省民風遵
彼岐梁言臻汧渭百年之老俱稱鼓腹五尺之童咸欣擊
壤瞻言曩昔亟游此地歲月踰邁以迄於茲周覽原隰悵
然懷舊延問鄉黨僚吏猶存事異宛譙情均豐沛民和俗
阜上下歡洽宜宣愷澤俾同慶幸可特赦岐隴二州管內
自貞觀四年十月一日昧爽已前大辟罪以下悉從原免
二州戶民無出一年租賦八十以上鰥寡篤疾及舊任二
州雜職佐史以上賜物各有差百歲以上就加優恤行經
咸陽始平武功三縣見禁之囚徒罪以上各降一等杖罪

以下并宜釋放年八十以上及鰥寡篤疾并武功縣舊軍
主帥亦加賜物凡此界內名山大川望秩之禮備加牲幣
孝子順孫義夫節婦隨事褒顯旌表門閭其賜物之差宜
依別勅務從周厚以稱朕意

曲赦武功詔

武功舊居與岐隴不異前令減罪未稱朕心其武功一縣
曲赦其罪及賜帛免租賦等特宜同岐隴二州

答趙郡王孝恭等請封禪手詔

省表具懷自有隋失道四海橫流百王之弊於斯爲甚朕

提劍鞠旅首啟戎行扶翼興運克成鴻業遂荷慈睠恭承
大寶每日旻思治弗敢康寧兢兢夕惕用忘興寢履薄馭
朽不足爲喻賴三靈顯命百辟同心海外無塵遠夷慕義
但流遁永久凋殘未復田疇多曠倉廩猶虛家給人足尚
懷多愧豈可遽追前代取譏虛美所望恂恂濟濟協力盡
誠輔其不逮致之王道如得雅頌形於金石菽粟同於水
火反朴還淳當如來議

令諸州剗削京觀詔

甲兵之設事不獲已義在止戈期於去殺季葉馳競恃力

肆威鋒刃之下恣情翦馘血流漂杵方稱快意屍若亂麻
自以爲武露骸封土多崇京觀徒見安忍之心未宏掩骸
之禮靜言念此憫歎良深但是諸州有京觀處無問新舊
宜悉剗削加土爲墳掩蔽枯朽勿令暴露仍以酒醑致祭
奠焉

封長孫無忌等子郡縣公詔

惟王建國厚禮被於元勲惟帝念功茂賞隆於延世是以
親賢作屏著在周經支庶畢侯義存漢典開府儀同三司
齊國公無忌尚書左僕射邢國公元齡故尚書右僕射蔡

國公如晦靈州都督吳國公尉遲敬德左光祿大夫吏部
尚書許國公高士廉兵部尚書潞國公侯君集右衛大將
軍郢國公宇文士及左武衛大將軍翼國公秦叔寶瀘州
都督宿國公程知節等或宇量凝深地兼賢戚或風鑒宏
遠功參帳幙或志懷強正便蕃左右或幹略宏舉契闊戎
旃或委質藩朝陳力王室誠著出納節表屯夷經文緯武
忠勤懇至固已契叶風雲寄深舟楫雖褒賢之道已紀於
旂常而推恩之令未洽於冑緒宜賜寵章式遵故實無忌
元齡如晦敬德各封一子郡公士廉君集士及叔寶知節

各封一子縣公俾夫拜前拜後比蹤曩烈如帶如礪垂裕
後昆

令宗室勲賢作鎮藩牧詔

欽明慎徽之朝稽古爲本體國經野之制利建爲先莫不
因可大之功宏可久之德與萬邦同其樂百姓共其安饗
祚遐長卜年用永䟽爵以五錫壤惟三周監二代煥乎前
史魏晉迄今舊章寢廢維城之義缺如建侯之道斯絕王
綱斲弛內無拯救之臣國步纔屯外無藩屏之衛致令大
盜猖獗動有窺覲蒸庶板蕩屢遭塗炭進乖爲民之策退

失象賢之典寧邦固本其可得乎朕祇膺大寶欽承景命
勵精治術安輯夷夏九服同軌六合一家日月所臨無思
不服豈伊人力天實賜之旣荷殊施休宏大賚疆理都邑
褒錫親賢與夫懿戚元功共享其利自我作古不必專依
前典允今約古隆基垂統世祿傳家足以載德圖身厚己
足以竭誠自然國有常奉民獲其福皇家宗室及勲賢之
臣德行可稱忠節顯著者宜令作鎮藩部宣條牧民貽厥
子孫嗣守其政非有大故無或黜免酬勤報効仍宜有差
宜令所司明爲條例等級具以奏聞

答虞世南上聖德論手詔

卿所論太美但朕德甚寡薄恐有識者窺卿爲後人所笑卿引古昔無爲而治朕未敢擬倫比之近代乍踰之耳卿覩朕之始未見朕之終宜付祕書若朕能慎終如初則可爲也如違此道不用後代笑卿焉

令州縣行鄉飲酒禮詔

比年豐稔閭里無事乃有墮業之人不顧家產朋遊無度酣宴是耽危身敗德咸由於此每覽法司所奏因此致罪實繁有徒靜言思之良增軫歎自非澄源正本何以革茲

弊俗可先錄鄉飲酒禮一卷頒示天下每年令州縣長官親率長幼依禮行之庶乎時識廉耻人知禮節

加楊恭仁特進詔

尊賢尚德義存致治高秩厚禮允屬勲庸左光祿大夫行揚州大都督長史觀國公恭仁識宇凝正風度夷簡器惟瑚璉望重縉紳歷官有聲歲寒若一而志在虛靜固求閒任辭理懇至確乎難奪宜成其美加茲寵命可特進

禁錮亂臣子孫詔

宇文化及弟智及司馬德戡裴虔通孟景元禮楊覽唐奉

義牛方裕元敏薛世良馬舉元武達李孝本李孝質張愷
許宏仁令狐行達席德方李覆等大業季年咸居列職或
恩結累世任重一時乃包藏凶慝罔思忠義爰在江都遂
行弑逆罪百閭趙覺深梟獍雖事是前代歲月已久而天
下之惡古今同棄宜從重典以厲臣節其子及孫并宜禁
錮勿令齒敘化及旣爲魁首又竊名號一門之內凶德尤
甚但其兄士及不預逆謀雖云昆季僅免誅戮自委質皇
朝勲庸克著彰善癉惡抑有舊章士及一房不在此例布
告天下咸使聞知

授長孫無忌司空詔

論道台階實賴明哲丹青神化寄深變理自非鹽梅是屬
棟幹有歸則曠職俟能罔或必備開府儀同三司齊國公
無忌器宇凝正風度峻遠才包文武地兼賢戚誠著草昧
之辰業預艱難之始功侔十亂聲高三傑亮采銓衡庶僚
有序儀形端右彝常以穆自任參鼎司位班槐路撫挹之
美形於縉紳翼贊之規彰於帷展宜崇名器允副具瞻可
司空所司具禮以時冊命

報長孫無忌讓司空詔

昔黃帝得力牧而爲五帝先夏禹得咎繇而爲三王祖齊桓得管仲而爲五伯長朕自居藩邸公爲腹心遂得廓清宇內君臨天下以公功績才望允稱具瞻故授此官無宜多讓也

遣使巡省天下詔

昔者明王之御天下也內列公卿允釐庶績外建侯伯司牧黎元惟懼淳化未敷名教或替故有巡狩之典黜陟幽明行人之官存省方俗用能遐邇遂性情僞無遺時雍之化率由茲道朕祇膺寶命臨御帝圖稟過庭之義方荷上

元之嘉祉四荒八表無思不服而夙興夕惕勤躬約己日
慎一日雖休勿休欲萬國歡心兆民有賴推誠待物近取
諸身實謂羣官受拜賢能自勵乃聞連帥刺舉或乖共理
之寄縣司主吏甚多黷貨之罪有一於此責在朕躬是用
終夜憮然旻景輟食宜遣大使分行四方申諭朕心延問
疾苦觀風俗之得失察政刑之苛弊耆年舊齒孝悌力田
義夫節婦之家疾廢憊嫠之室須有旌賞賑贍聽以倉庫
物賜之若有鴻材異學留滯末班哲人奇士隱淪屠釣宜
精加搜訪進以殊禮務盡使乎之旨俾若朕親覩焉

討吐谷渾詔

朕嗣纂鴻業思恢至道端拱垂裳於茲九載式修文德寧
謐區宇徼外君長海表酋渠無遠不庭無思不服而吐谷
渾蕞爾小蕃負固河右地不遠千里衆不盈一萬不量其
力不恤其人肆情拒命抗衡上國朕每遣行人入蕃曉諭
并引其使者臨軒戒勗示以善道勸以和親欲使境上無
虞各安其業訓導積年凶頑未改剽掠邊鄙略無寧息今
上書傲很拘我使人內外百僚華夷兆庶同心憤怨咸願
誅討宜乘弔伐之機以展鷹鷂之志長驅尅期窮其巢穴

罪止吐谷渾可汗昏耄之主及天柱王一二邪臣自餘部落皆無所問夷凶息暴稱朕意焉

水潦大赦詔

天地播氣垂生育之德皇王御極宏覆幬之仁故能財成萬類光宅八表朕祇奉慈訓嗣守鴻業承百王之季末屬四海之凋殘夜興夕惕無忘兆庶克己勤躬思隆政道欲使陰陽順序干戈載戢庶幾前烈致茲刑措而山東之地頻年不稔水雨爲災饑饉相屬蠢爾西戎屢擾邊境事不獲已遂勞兵車良由誠未動天德不被物興言念此撫已

多慚加以澆僞尚繁典刑仍用雖復留心聽斷明慎庶獄
嘗恐縲紲之中含冤靡訴憲網所及無辜致罪一物有怨
責深在余今歲惟暮春時屬生長宜順天布澤與物更新
可大赦天下自貞觀九年三月十六日昧爽以前大辟罪
已下皆赦除之其常赦不免者不在赦例鰥寡憫獨不能
自存者所在官司量加賑恤

太上皇康復詔

書不云乎一人有慶兆民賴之朕虔奉太安愛敬崇極日
嚴之養祗慄斯在近日聖躬違豫寢膳有虧憂懼在懷不

遑寧處博求醫術備盡蠲療祈告明靈具陳懇篤上元降
福遂蒙昭祐應時康愈萬福咸宜慶幸之隆實兼家國思
班愷樂洽於卿士然而尚齒興孝德教所先饗餼是加義
超常等諸州都督刺史及文武官人老人八十以上并孝
子旌表門閭者並宜節級賜物以申饗宴庶使萬國之內
同此歡心施於四海皆知朕意

復建吐谷渾詔

伐罪弔人前王高義興亡繼絕有國令典吐谷渾擅相君
長竊據荒裔志在凶德政出權門酋渠攜貳種落怨憤長

惡不悛野心彌熾莫顧藩臣之節曾無事上之禮草竊疆
場虐割氓庶積惡旣稔天亡有徵朕君臨四海含有萬類
一物失所深責在予所以爰命六軍申茲九伐義存活國
情非黷武其子大寧王慕容順隋氏之甥志懷明悟長自
中土早慕華風爰見時機深識逆順以其父愼懷違衆獨
蹈迷途遂誅邪臣存茲大計翻然改轍代父歸罪忠孝之
美深有可嘉子能立功足以補過旣往之釁特宜原免然
其建國西鄙已厯年代即從廢絕情所未忍繼其宗祀允
歸令子封順西平郡王食邑四千戶仍授趙胡呂烏甘豆

可汗所司量遣使人備禮冊命

命皇太子權知軍國事詔

朕以不天夙罹偏罰假息旦暮分沈苦壤仰賴先皇慈恩
鞠育爰自幼年至於成家未及弱冠仍屬亂離翼奉義旗
身當矢石克平多難任居藩屏遂復委以萬機膺茲景命
祇懼虛薄弗克負荷日夜兢兢不遑寧晏加以氣患屢幸
九成晨昏定省廢於朝夕今歲停行盡行養禮不謂殃罰
深重大行崩背號天叩地無所逮及伏奉遺詔追跡漢文
以日易月降其常期顧命之旨誠不可違然三年之喪自

天子達殷周以來罔弗遵用漢文變古有乖前式且慈顏
日遠忻謁無由俯就之文理即遵奉然朕之情切不可循
前荼毒之心何可堪忍皇太子承乾文過志學秉性聰敏
頻年治國理務允諧今欲於東宮平決朕得盡哀廬室終
其喪紀望羣公卿士股肱王室興言及此唯增哽絕朝多
君子恕朕哀心

度僧於天下詔

門下三乘結轍濟度爲先八正歸依慈悲爲主流智慧之
海膏澤羣生翦煩惱之林津梁品物任真體道理叶至仁

妙果勝因事符積善朕欽若金輪恭膺寶命至德之訓無
遠不思大聖之規無幽不察欲使人免蓋纏家登仁壽冥
緣顯應大庇含靈五福著於洪範三災終於世界比因喪
亂僧徒減少華臺寶塔窺戶無人紺髮青蓮櫛風沐雨眷
言凋毀良用憮然其天下諸州有寺之處宜令度人爲僧
尼總數以三千爲限其州有大小地有華夷當處所度多
少委有司量定務須精誠德業無問年之幼長其往因減
省還俗及私度白首之徒若行業可稱通存取限必無人
可取亦任其闕數若官人簡練不精宜錄附殿失但戒行

之本惟尚無爲多有僧徒溺於流俗或假託神通妄傳妖怪或謬稱醫筮左道求財或造詣官曹囑致賄賂或鑽膚焚指駭俗驚愚並自貽伊戚動挂刑網有一於此大虧聖教朕情深持護必無寬捨已令依附內律參以金科具陳條制務使法門清整所在官司宜加檢察其部內有違法僧不舉發者所司錄狀奏聞庶善者必採惡者必斥伽藍淨土咸知法味菩提覺路絕諸意垢

錄先朝姻舊臣僚詔

高祖大武皇帝天縱神武膺籙受圖可久之德格乎區宇

敦睦九族協和萬邦賢能必進德化潛洽革百王之弊興
三代之風天平地成邇安遠肅至德被於四海休烈光於
千載巍巍蕩蕩無得而稱焉朕嗣膺寶祚夙夜兢惕思述
先志被之率土其內外姻戚生平故舊太原元從官人及
厯試之所文武寮佐爰及胥吏往雖每降國恩恐未周悉
或才用不申階品屈滯或家道貧匱子孫沈淪須有矜量
咸使得所先朝憂勞庶政惟以恤民爲本諸州都督刺史
有政績可稱者具以名聞其諸州百姓奉營山陵者亦宜
量有蠲免可令所司詳爲條例聞奏並務從優厚稱朕意

焉

議於太原立高祖寢廟詔

昔周監二代崇文武之典禮漢紹三王尊高光之功烈斯
固有國之彝訓不刊之令範高祖大武皇帝聰明神武叡
聖徇齊應天順民撥亂反正德侔造化道濟區夏靖率土
之沸騰拯黔首之塗炭一戎大定四海宅心制治定之禮
作功成之樂天地交泰品物咸寧聲教遐洎休徵雜沓蠻
夷戎狄之長輻湊藁街麟鳳龜龍之祥光映圖史然猶日
慎一日推而弗居邁邃古之鴻名踰前王之至治朕以寡

昧丕承景業緬惟永往攀慕終天思宏尊親之治庶展罔
極之志竊惟太原之地肇基王迹事均豐沛義等宛譙理
宜別建寢廟以彰聖德詳觀漢典抑有成規但先皇遺旨
務存儉約虔奉訓誡無忘啟處宜令禮官與公卿等詳議
以聞

令侯君集等經略吐谷渾詔

近以吐谷渾恃其遐阻屢擾疆場肆行凶虐種類乖離爰
命將士申茲弔伐有征無戰所向摧殄渠魁竄迹自貽滅
亡朝威遠暢邊庭靖謐朕君臨寰宇志在含宏不欲因彼

危亂絕其宗祀乃立僞主之子大寧王慕容順撫招餘燼
守其舊業而順曾不感恩遽懷貳志種落之內人畜怨憤
遂創大義即加剿絕雖復權立其子所部又致擾亂競動
干戈各行所欲朕憂勞兆庶無隔夷夏廼睠西顧良用矜
惕若不星言拯救便恐塗炭未已兵部尚書潞國公侯君
集等咸才兼文武寄深內外嘉謀著於廟堂茂績書於王
府必能宣風聞外克定遐方可量其事機綏撫經略分遣
使人明加曉諭如有不遵明旨敢興異志即合精銳隨便
翦撲盡威懷之道稱朕意焉

節省山陵制度詔

朕旣爲子卿等爲臣愛敬罔極義猶一體無容固陳節儉陷朕於不義也今便敬依來議

薦舉賢能詔

朕遐想千載旁覽九流詳求布政之方莫若薦賢之典是以元凱就列仄微可以立帝功管隰爲臣中人可以成霸業朕緬懷曩烈虛己英奇斷斷之士必昇於廊廟九九之術不棄於閭閻猶恐在陰弗和獨善難奪永言髦傑無忘鑒寐是以去夏之中爰動翰墨披露丹腑疇咨海內尺木

旣樹思覩游露之羣雲羅宏舉佇降翔庭之翼而諸州所
舉十有一人朕載懷仄席引入內殿借以溫顏密訪政道
莫能對揚相顧結舌朕仍以其未覩闕庭能無戰悚令於
內省更以墨對雖構思彌日終不達問旨理旣乖違詞亦
庸陋豈可飾丹漆於朽質假風雲於決起者哉宜並放還
各從本色其舉主以舉非其人罪論仍加一等然則今之
天下猶古之天下也寧容仲舒伯起之流徧鍾美於往代
彥和廣基之侶獨絕響於今辰故其見知也則平津與樂
安並進其不用也則敬通與亭伯同悲淮陰所以興言子

長所以貽歎因斯論之良由俊造難進或固栖遲之節牧
宰循常未盡搜揚之道撫事長息彌用懽然今州縣依前
薦舉皆集今冬奇偉必收浮華勿採無使巴人之調濫吹
於簫韶魏邦之珍沈光於漢水務盡報國之義以副欽賢
之懷

九峻山卜陵詔

夫生者天地之大德壽者修短之常期生有七尺之形壽
以百齡爲限含靈稟氣莫不同焉皆得之於自然不可以
分外企也雖迴天轉日之力盡妙窮神之智生必有終皆

不能免是以禮記云君即位而爲禋莊周云勞我以形息
我以死聖人之至鑒通賢之深識著之典誥詒之話言顯
說正詞曾無隱諱末代以來明辟蓋寡靡不矜黃屋之尊
慮白駒之過並多拘忌希慕遐年謂雲車易乘曦輪可駐
異軌同趨其蔽甚矣有隋之季海內橫流豺狼肆暴吞噬
黔首邑里凋殘鞠爲邱墟朕投袂發憤情深拯溺扶翼義
師濟斯塗炭賴蒼昊降鑒股肱宣力提劒指揮天下大定
氛祲清殄區宇平一反澆弊於淳樸致王道於中和此朕
之宿志於斯已畢猶恐身後之日子子孫孫尚習流俗猶

循常禮加四重之櫬伐百祀之木勞擾百姓崇厚園陵今
預爲此制務從儉約於九峻之山足容一棺而已積以歲
月漸以備之木馬塗車土桴輦簫事合古典不爲時用又
佐命功臣義深舟楫或定謀帷幄或身摧行陣同濟艱危
克成鴻業追念在昔何日忘之使逝者無知咸歸寂寞若
營魂有識還如疇曩居止相望不亦善乎漢氏使將相陪
陵又給以東園祕器篤終之義恩意深厚古人之志豈異
我哉自今以後功臣密戚及德業尤著如有薨亡宜賜塋
地一所給以祕器使窆窆時喪事無闕所司依此營備稱

朕意焉

封慕容諾曷鉢河源郡王詔

文德懷遠列聖之宏規興亡繼絕至仁之通訓吐谷渾發
跡東胡竄居西域負險自固擅立君長爰在前代通使中
原或爲叛臣不常厥德近者慕容步薩鉢爲主老而不智
迷而忘返志懷首鼠虔劉疆場朕頻命行人殷勤誘諭不
納忠信之言惟行蠶蠶之毒及六軍問罪尚令申諭遂無
悛革以至滅亡其子順國蹙事窮厯身無所委命下吏輿
櫬轅門故令解網釋俘繼其宗祀乃懷貳志遵彼覆車曾

未浹旬自貽屠戮子燕王諾曷鉢弱不好弄幼稱通理纔纂舊業即逢內難故遣旌節遠申安撫遂能率其種類同竭誠款盡其巢落迎謁使者屈膝頓顙遵奉朝化請頒正朔願入提封丹誠內發深可嘉尚宜隆寵章懋茲賞典可封河源郡王食邑四千戶仍授烏地也拔勒豆可汗即遣使人備禮冊命

授溫彥博尚書右僕射詔

文昌治本端副望隆朝綱所屬選衆斯在中書令虞國公溫彥博體業貞固學藝該明器惟瑚璉材稱棟幹任總絲

綸職居近密乃心著於帷幄嘉謀表於樽俎寄深啟沃義切鹽梅宜升禮闈允茲彝序可尚書右僕射勲封如故

許魏徵遜位手詔

留侯名相濟北之志已高疏傳人師東都之迹彌著後進仰其遺烈前策以爲美談諒可以砥節礪行化俗宏風者也左光祿大夫侍中鄭國公魏徵器量沈敏軌儀詳正文思優贍學業該通自參贊機衡綢繆幃幄知無不爲心力備盡格言弗隱正義日聞一德載宣四聰斯達實賴嘉猷用康治道而深執謙損志懷沖退詞誠懇切良用撫然杼

軸於懷屢移氣序而固陳丹款義在難違今使伸其雅志
以成厥美可特進封如故仍知門下事朝章國典參議得
失自徒流以下罪詳事奏聞其祿賜及國官防閤等並同
職事

悼元琬律師詔

元琬律師戒行貞固學業精通方冀宏宣正法利益羣品
不幸沒世情深惻悼